

POČELI RADOVI NA SANACIJI ŠKOLSKOG DVORIŠTA OŠ „GRBAVICA I“

Općina Novo Sarajevo jedna je od 10 najuspješnijih općina u BiH koja je dobila nepovratna sredstva u okviru Projekta unapređenja efikasnosti lokalnih usluga (PIPLS) u Bosni i Hercegovini.

Općina Novo Sarajevo jedina je jedinica lokalne samouprave iz Sarajeva koja je ostvarila najbolje rezultate u implementaciji aktivnosti u okviru projekta PIPLS, te dobila značajna sredstva sa realizaciju projekta sanacije školskog dvorišta OŠ “Grbavice I” sa kojim je aplicirala na Javni poziv.

Općinski načelnik dr. Hasan Tanović, zahvalio se Vladi Švedske i UNDP-u na podršci, kao i općinskim službenicima koji su dali svoj maksimum kako bi ovaj projekat zaživio na području općine Novo Sarajevo.

Izuzetno smo ponosni na rezultate koje smo postigli i da budemo prva lokalna zajednica u Kantonu Sarajevo koja je ispunila kriterije i dobila mogućnost povlačenja znatnih sredstva iz fondova Vlade Švedske koja će nam biti veoma bitna. Općina Novo Sarajevo realizuje projekat sanacije školskog dvorišta OŠ “Grbavice I” čija je vrijednost 290.000 KM, od čega je Općina izdvojila 203.000 KM, a UNDP kroz PIPLS projekat dodjeljuje 87.000 KM, istakao je načelnik Tanović te dodao da se radi o kapitalnom projektu bitnom za ovu lokalnu zajednicu.

Osnovnu školu “Grbavica I” pohađa 570 učenika koji svakodnevno koriste školsko dvorište, kako tokom redovne nastave, tako i za vannastavne aktivnosti i boravak na otvorenom. Postojeće dvorište trenutno ne zadovoljava propisane standarde, jer je izgrađeno 1950. godine, a posljednji put sanirano je davne 1997. godine. Ova škola je prepoznatljiva u KS po sportskim uspjesima svojih učenika/ca, te će stvaranje adekvatnih uslova za bavljenje sportom značajno doprinijeti postizanju još boljih rezultata i povećanju motiviranosti učenika/ca za bavljenje sportom općenito i unapređenju kvaliteta života i zdravlja učenika/ca, kao i njihove sigurnosti. Realizacijom ovog projekta bit će sanirana tri sportska igrališta za mali nogomet, košarku i odbojku, a uredit će se i pristupna staza.

Sanacija dvorišta ove škole doprinosi unapređenju odgojno-obrazovnog procesa, kao i poboljšanju uslova boravka i rada učenika/ca i nastavnika/ca, podizanju nivoa sigurnosti učenika/ca, te realizaciji vannastavnih aktivnosti.

Aktivnost/projekat realizira se u okviru Projekta unapređenja efikasnosti lokalnih usluga u Bosni i Hercegovini (PIPLS) kojeg primarno finansira Švedska, a sufinansira i provodi Razvojni program Ujedinjenih nacija u Bosni i Hercegovini (UNDP BiH) i Općina Novo Sarajevo.